

प्रादेशिक समाचार

- केन्द्रीय कृषि मंत्री नरेन्द्र सिंह तोमर कह्यो –मोटा अनाज री खेती पाणी री कमी वाळा हलका मांय ई करी जा सके है- नई दिल्ली मांय अंतर्राष्ट्रीय मोटा अनाज वर्ष 2023 रो सरूआती कार्यक्रम राखी ज्यो।
- सरकार जलवायु संकट अर प्रौद्योगिकी मांय बदलाव ने ध्यान राखता थकां काशतकारां रा भला सारू प्रधानमंत्री फसल बीमा योजना मांय बदलाव बाबत तैयार ।
- भीलवाडा मांय दो जणा माथे गोळियां चलावण री वारदात मांय एक जणा री मौत – एक जणो जख्मी व्हयो – जिला मांय 48 घंटा सारू मोबाइल इंटरनेट सेवा बंद करण रा हुकम दिया ज्यो।
- मुख्यमंत्री अशोक गहलोत श्रीमहावीरजी मांय पंच कल्याणक अर महामस्तकाभिषेक महोत्सव री सरूआत कीनी।
- प्रदेश रा 14 जिलां मांय पारो 10 डिग्री सेल्सियस ऊं नीचे उतर्यो-सीकर रो फतेहपुर 2 दशमलव 4 डिग्री सेल्सियस तापमान सागे सब ऊं ठण्डी ठोड रह्यो।

0000

साल 2023 अंतर्राष्ट्रीय मोटा अनाज वर्ष रा तौर ऊं मणायो जावेला। मोटो अनाज बत्तो पोषक व्हे है कांकि इण मांय गेहूं अर चावल री तुलना मांय प्रोटीन, फाइबर अर खनिज री तादाद बत्ती व्हे है। मोटा अनाज मांय ज्वार, बाजरा, रागी, मक्का अर चौलाई शामिल है। मोटा अनाज रा बारा मांय जाग जगावण रा मकसद ऊं साल 2023 मांय न्यारा-न्यारा कार्यक्रम व्हेला। इण ई सिलसिला मांय आज नई दिल्ली मांय मोटा अनाज साल 2023 रो कार्यक्रम राखी ज्यो। ई मौके विदेश मंत्री डॉ० एस. जयशंकर कह्यो के कोविड अर आब-ओ-हवा मांय बदलाव ने ध्यान राखता थकां मोटा अनाज रो महत्व बध ग्यो है। वे कह्यो के कोविड ऊं आ ठा पड़ी है के महामारी अर खाद्य सुरक्षा बीचे मोटो रिश्तो है। डॉ. जयशंकर कह्यो के आब-ओ-हवा मांय बदलाव ऊं उत्पादन मांय कमी अर कारोबार मांय अड़चन री शंका है। ई मौके कृषि मंत्री नरेन्द्र सिंह तोमर कह्यो के अंतर्राष्ट्रीय मोटा अनाज वर्ष ऊं खाद्य सुरक्षा अर पोषण मांय मोटा अनाज रा महत्व रा बारा मांय जागरूकता पैदा व्हेला। वे कह्यो के भारत पोषक अनाज री उपज लेवण वाळा अगाड़ी देशां मांय शामिल है। तोमर कह्यो के मोटा अनाज री खेती कम पाणी वाळा हलकां मांय ई करी जा सके है। वे कह्यो के कृषि मंत्रालय मोटा अनाज री खपत अर पैदावार मांय बधोतरी सारू मिशन मोड मांय काम कर रह्यो है।

ई कार्यक्रम मांय भारत मांय साठ ऊं बत्ता देशां रा उच्चायुक्त अर राजदूत सिरकत कीनी। देश मांय पैदा व्हेवण वाळा बाजरा रो 85 फीसदी राजस्थान मांय उपजे है। कार्यक्रम मांय राजस्थान री नुमाइन्दगी जयपुर री स्टार्टअप उद्यमी तनुश्री सिंह कीनी। वे आकाशवाणी समाचार जयपुर सागे बातचीत करता थकां जनता ऊं रोजीना रा खाण-पीण मांय मोटो अनाज काम लेवण री अपील कीनी।

000

सरकार जलवायु संकट अर नुवी प्रौद्योगिकी ने ध्यान राखता थकां काशतकारां रा भला सारू प्रधानमंत्री फसल बीमा योजना- पी.एम.एफ.बी.वाई. मांय बदलाव सारू तैयार है। आधिकारिक पानड़ी रे मुजब कृषि अर किसान कल्याण मंत्रालय रा सचिव मनोज आहूजा बतायो के साल 2016 मांय ई कार्यक्रम री सरूआत पाछे नुवी चुनौतियां रो सामो करण सारू इण मांय मोटा बदलाव कर्या जा चुक्या है। वे बतायो के साल 2018 मांय काशतकारां सारू फसल खराबा री जाणकारी देवण री मियाद 48 घंटा ऊं बधा र 72 घंटा करण समेत केई बदलाव करी ज्यो। सचिव कह्यो के उपयुक्त खेती रा अनुरूप फसल बीमा योजना री पहुंच अर इण रा संचालन मांय नवाचार, डिजिटीकरण अर प्रौद्योगिकी खास भूमिका अदा कर रह्या है। कृषि अर किसान कल्याण मंत्रालय रे मुजब पी.एम.एफ.बी.वाई. फायदो लेवण वाळा काशतकारां रा नाम मंडावण रा मामला मांय फिलहाल दुनिया री सब ऊं मोटी फसल बीमा योजना है, ज्यीं रा तैत हर साल औसतन साढ़े पांच करोड़ नाम मंडाया जा रह्या है। प्रीमियम री रकम जमा करण रा मामला मांय आ दुनिया री तीजी सब ऊं मोटी योजना है।

000

वित्तमंत्री निर्मला सीथारमन नई दिल्ली मांय माली साल 2023.-24 रा बजट ऊं पैली री पांचवीं मीटिंग मांय सेवा अर कारोबार हलका रा जाणकारां सागे विचार-विमर्श कीनी। मीटिंग मांय वित्त राज्य मंत्री पंकज चौधरी अर डॉ० भगवत कराड ई मौजूद हा। वित्त सचिव डॉ० टी वी सोमनाथन अर दूजा आला अहलकार मीटिंग मांय सिरकत कीनी। वे स्वास्थ्य, शिक्षा, ग्रामीण विकास, जल अर स्वच्छता समेत सामाजिक हलका रा जाणकारां सागे बजट पूर्व परामर्श बैठक कीनी।

000

भीलवाडा मांय बडला चौराहा कने आज दो जणा माथे गोळियां चलावण री वारदात मांय एक जणा री मौत व्हे गयी अर एक जणो जखमी व्हे गयो। अजमेर संभाग रा संभागीय आयुक्त भीलवाडा जिला मांय 48 घंटा सारू मोबाइल इंटरनेट सेवा बंद करण रा हुकम दीना है। शहर मांय मोटी तादाद मांय पुलिस जाब्तो लगायी ज्यो है। अतिरिक्त पुलिस अधीक्षक ज्येष्ठी मैत्री वारदात रा बारा मांय जाणकारी दीनी।

भीलवाडा रा एस.पी. आदर्श सिद्धू कह्यो के अपराधी बेगा ई पकड लिया जावेला। वे अफवाहां माथे ध्यान नी देवण अर कानून व्यवस्था बणायी राखण मांय मदद करण री अपील कीनी।

000

मुख्यमंत्री अशोक गहलोत कह्यो है के भगवान महावीर री सीख आज ई प्रासंगिक है। वे आज करौली जिला रा श्रीमहावीरजी मांय पंचकल्याणक महोत्सव अर महामस्तकाभिषेक समारोह मांय बोल रह्या हा। गहलोत कह्यो के जठे शान्ति अर अहिंसा रो माहौल व्हे है, वठै देवता रो रेहवास व्हे है। वे कह्यो के भगवान महावीर री सीख ले र ई महात्मा गांधी सत्य अर अहिंसा रा विचार अपनाया। श्री महावीर जी मांय आज पंचकल्याणक महोत्सव सरू व्ह्यो। इण री सरूआत मुख्यमंत्री अशोक गहलोत झण्डो चढा र कीनी। कार्यक्रम मांय पर्यटन मंत्री विश्वेंद्र सिंह, पंचायती राज मंत्री रमेश मीणा, पीडब्ल्यूडी मंत्री भजनलाल जाटव अर सवाई माधोपुर, हिंडौन अर करौली रा विधायक लाखन सिंह ई मौजूद हा। महोत्सव रे दौरान महावीर स्वामी री 24 फीट ऊंची खड्गसासन मूरत अर 24 तीर्थकरां री मूरत रो पंचकल्याणक कर्यो जावेला। 4 दिसंबर ताई चालण वाळा ई महोत्सव मांय न्यारा-न्यारा कार्यक्रम राख्या जावेला।

000

मुख्यमंत्री अशोक गहलोत आज सवाईमाधोपुर जिला रा गंगापुर सिटी मांय जिला अस्पताल रा काम री नींव रखी। ओ अस्पताल बणावण रा काम माथे कोई 38 करोड़ 73 लाख रूप्या रो खर्चो आवेला। ई मौके चिकित्सा अर स्वास्थ्य मंत्री परसादी लाल मीणा, विधायक रामकेश मीणा अर दानिश अबरार समेत जनता रा केई नुमाइन्दा मौजूद हा।

000

आज सिख पंथ रा नौवां गुरु तेग बहादुर रो शहीदी दिवस है। राष्ट्रपति दौपदी मुर्मू वां ने श्रद्धांजलि देता थकां साहस अर बलिदान रो प्रतीक बतायो। राष्ट्रपति कह्यो के गुरु तेग बहादुर जी धर्म अर समाज री हिफाजत सारू सब कुछ बलिदान कर दीनो।

000

प्रदेश मांय पारो 14 डिग्री सेल्सियस ऊं नीचे उतर गयो है। 14 जिलां मांय तापमान 10 डिग्री सेल्सियस ऊं नीचे दर्ज करी ज्यो। सीकर जिला रो फतेहपुर कस्बो आज ई 2 दशमलव 4 डिग्री सेल्सियस न्यूनतम तापमान सागे राज्य मांय सब ऊं ठण्डी ठोड रह्यो। माउंट आबू मांय 4 अर चूरू मांय 4 दशमलव 1 डिग्री सेल्सियस न्यूनतम तापमान दर्ज करी ज्यो। जयपुर मांय ई पारो मुकाबले एक डिग्री सेल्सियस उतर्यो। अजमेर मांय रात री बगत गलन रे कारण सड़क री कोर माथे रेहवण वाळां ने अलाव रो सहारो लेणो पड़्यो। संवारे री पोर शहर रा केई हलकां मांय कोहरो रेहवण लाग्यो है। ठण्ड रे कारण नगर निगम कानी ऊं चलाया जा रह्या रैन बसेरां मांय लोगां री तादाद बधबा लागी है। अलवर मांय दिन मांय तेज धूप रही, जदके सिज्यां री पोर मौसम ठण्डो व्हे गयो। श्रीगंगानगर, हनुमानगढ़, चूरू अर सीकर मांय केई ठोडां संवारे हल्को कोहरो रह्यो। मौसम रा जयपुर केन्द्र रा निदेशक राधेश्याम शर्मा बतायो के राज्य रा ऊगणी हलका मांय पारो 2 डिग्री सेल्सियस और उतरण रा आसार है।

000

अलवर रो ठावो मत्स्य उत्सव आज सरू व्ह्यो। 27 नवम्बर ताई चालण वाळा ई उत्सव री सरूआत जगन्नाथ जी मिन्दर मांय महाआरती सागे व्ही।

000